



ITLF BULLETIN

Issue No 35
04 November 2023

MEILHEI COMMANDO OPERATION JEH'A MOREH BUOI

Achiesa October nisim 31, 2023 nikhua'a mel hetlouho'n Meilhei Police Officer Chingtham Anand Kumar, SDPO ana kaplihu'toh kilhon in Moreh khopi sung'a boina ana lhung in ahi. Meilhei government in hiche thilsuohhi phat gomkuom'a la in Moreh khopi sung le akimvelho'ah boina ana lhunsah uve. Union Home Minister Amit Shah in Manipur ahung pah laipeh'a chu Moreh apat'a Meilhei sepoy ho lahdohna ding'a kitepna ana nei hitazong leh tuni geiyin toh muolsuo ahi hihlaiyin, CM N. Biren in Meilheite phatchuomna ding in Kuki-Zo chate Moreh a kuon'a nodoh teina ding in Meilhei sepoy ho amangcha zing in ahi.


Achiesa September nisim 13 nikhua'a SI Onkhomang Haokip, Chingphei khuo'a Meilhei sniper in ana kaplihna chungthu'ah innsung mite Dk. 10 Lacs a sietvetna neiding thu ana phuongdoh uvin, hinla tunigeiyin siki cha zong piehdoh ahi hihlai uve. Ahinla tuchung'a Moreh'a Meilhei officer khat kikaplihna'a hi Biren in Dk. 50 Lacs innsung mite khut'a pieh ding in kitepna ana neipai in ahi. Meilhei le thinglhang mi kikhah'a luongman zong kibanglou ahida'n mudoh thei in aum'e.

Meilhei Police officer kaplih ahi nikhua'n Chikim Veng'a Wall of Remembrance ding kisa ban zinglai chu ana hallha uvin, sit-in-protest kiphinna nei numeiho anocheh uvin, nupi kiphinna neiho'n amanchah'u bubel-mebel, chabel ho geiyin ana suhsiet pieh uvin ahi. Chule Imphal akuon'a Moreh juon'a chie Meilhei Police Commando ho'n Senam khuo'ah inn 4 ahallha uvin, car 2, chule gari-neo 2 zong asuse uvin ahi. Hiche jiengseh chu hilou in innsungho'ah alut uvin, sum-le-pai, sana-dangka amuphah chan'u ahilah uvin ahi.

November nisim 1 ni jingpi matah in Assam Rifles hotoh kithuo in Meilhei Commando ho'n Phaicham Veng le Gamnomphai'ah operation abawl uvin, Burma mi 20 val jaona'n eimi 12 ana man uve. Gamnomphai Village Authority Chairman pa innsung'a achate'n kichepna'a anei'u binocular amudoh jeh uvin anaman uvin, chule pienken'a tahsa bulhinglou Luncha Haokip zong ana man uvin ahi. Nilhah lam nidan 4 vel in mi 12 amat ho'u ana lhadoh uve.

Amun'a umho akuon'a thulhut kimu dungjuiyin Assam Rifles te'n Meilhei Commando ho Moreh khopi sung'ah jaansot nung in ana polut uve akiti. ITLF lamkaiho leh Amit Shah New Delhi a akimutuona'a chun Meilhei police ho'n amaho changseh'a na atoh theiloudi'u, Central Forces vetsuina nuoiya bou chatloh theidi'u ti anahi'n, hizong leh tuchung Moreh thilsuoh'a hi Meilhei Commando ho chalohdan hi avesui umlou, ahilou leh kimulou sah ahida'n mudoh ahi.

Meilhei Commando ho'n huham tah'a operation abawl jehu vin numei chapang'a ding in lungmuonna aumpuon, chule pasalho zong gamlah'a ana kiseldoh uvin ahi. Operation kilepna'a neiyin innsung'a sana-dangka, sum-le-pai agudoh uvin, gariho asuse uvin, innsung thilkeoho jieng zong asuse uve. November nisim 2 ni'n numei chapangho inn'a gieh ngam talou in sepoy camp ana bel uvin, janni November nisim 3 ni'n vang nimasaho'a bang in thilsuoh vang aum tapoi.



Certificate hallha

Sintha Lourebam kiti Meilhei pasal khat in Kuki-Zo simlaiho certificate ahallhahna video viral akuon in hetdoh ahi. Buoï sunga eimite chenna inn a dahlhah na inn hoa thiemzilna certificate ho achomdoh uvin, hiche hochu banneicha ahallhah ahida'n akimu'n ahi.

Hiche video a alim kimu'a certificate hallhapa identity khuol ahi'n, amin Sintha Lourebam ahi'n, chule IndiGo ground staff ahi zong social media akuon'a hetdoh ahitoh kilhon in Twitter warrior ho'n IndiGo hetsahna abawl uvin, IndiGo in zong action alahding ahidan dawnbutna ahin bawl uve. Khonung thu kihet dan in amahi IndiGo a tongtalou dan ahi.

Hiche certificate hohi mimal thil hizong leh government property zong ahi'n, moh koidap thei thil ahi tapoi. Non-tribal khat in tribal ahijeh'a mi document ahallhah pieh hi National Commission for Schedule Tribes hi'ng'a SC and ST Prevention of Atrocities Act, 1989 nuoiya heh tei-tei ding ahi. Kiloikhomnaho bou nganselou'a mipi lam in zong i-gelkhoh uva FIR bawl thei chan i-bawl ding uvin tep ihiuve.



Thinglhangmi MLA 10 in Moreh thu'a thusuo nei

November nisim 2, 2023 nikhuo'n Kuki-Zo MLA 10 ho'n joint statement ana suodoh uvin ahi. Thusuo aneina uva Tengenoupal Dist sung'a Kuki-Zo chate chung'a Manipur State Commando huhamtah'a achalohna thu nasatah in demna thu ana phuongdoh uvin ahi.

October nisim 31, 2023 nikhuo'a Ch. Anand Kumar,

SDPO thina thu'ah tuolthatho holdohna ding'a Meilhei Commando ho'n Kuki-Zo chate innsung'a thilkeo asuhsiet uva, sum-le-pai aguhdoh uva, milhamho lunglinglao tah'a aumsahna'u thu demna thu apuondoh uve.

Thinglhang gam'a Meilhei commando lutsah lou ding adeisahthu'u ana lhangsap nung uvin zong Meilhei Commando ho thinglhang gam'ah aum zing uvin, hiche thu hi akinthei lampen'a Ministry of Home Affairs in agelkhoh'a, Kuki-Zo chate chenna gamsung zouse akuon'a Meilhei Commando ho alahdoh ding uvin tepna abawl uve.

Zo United in mipi hieng'a ngehna nei

November nisim 1, 2023 nikhuo'a Zo United Executive emergency meeting aneina uva, tuchung'a Tengenoupal District sung'a sopi u-le-naote'n Meilheite akuon'a engbawlina jatchuom chuom atuo uva, gentheina le hahsatna atuo'u gelkhohpen'a neiyin amaho kithuopina ding dan lunggel ngaituona ana nei uvin ahi. Hiche toh kilhon chun Zo United in Philanthropic Organisation chuom-chuom ho hieng'ah thumna ana nei uvin, eima-eima namsung'a panpina donthei chan'a don'a, Tengenoupal a ding'a kithuopina November nisim 5 kahsung'a Zo United khut'a piehlut ding in tepna ana bawl uve. Hiche toh kilhon in philanthropic organisation chuom-chuom ho'n ama-ama namsung'ah kithuopina ding in panlahna ana nei pai-pai uve.

Kuki Inpi Tengenoupal in Amit Shah lekha thot

November nisim 3, 2023 nikhuo chun Kuki Innpi Tengenoupal (KIT) in Meilhei Commando holeh Arambai Tenggol ho'n Moreh khopi sung'a Kuki-Zo chate chung'a huhamtah'a achalohna thu uva Union Home Minister Amit Shah lekha ana thot uvin ahi. Combing Operation kilepna'a neiya Kuki-Zo chate nei-le-gou aguh uva, numei chapang lunglinglao tah'a aumsah uva, thilkeo asuhsiet uva, gariho ahallha uva, sum-le-pai, sana-le-dangka aguh'u ahi ti'n lekhat'ah chun ana sei uve. State mipite vengbit ding state force in Kuki-Zo chate abawlina hi state mipi'a simtha ahitahlou jeh uva aganna thei pen'a Separate Administration apuondoh ding poimo ahida'n aseï uve..

ITLF Relief & Medical department hieng'a kithuopina phabep lut

Frontline a duty ho nehding lhasam tah'a aumlai uvin chunglam akuon in phattheina ahung lhun toh kilhon in ITLF Relief & Medical Department khut'ah kithuopina phabep ahung lut in ahi.

Reformed Presbyterian Church (NEI) akipat in Daal 3 bags; Chi 3 bags; Thao 20 boxes; Detergent 1 bag; Soya 15 boxes; Mosquito Net 45 pieces; Annchang 3 bag, chule Chini 2 bag ahung lut'e. Rural Women Upliftment Society (RWUS) akuon in annchang bag 25; Wesleyan Methodis Church of East India akuon in annchang 12 bag ahung lut'e. Chule Jayson Victor akuon in blanket 270 zong ahung lut in ahi.

Hapta kit sung'a frontline lam'a duty ho nehding annchan lhasam zing nalai ahijeh Relief & Medical department a lamkaiho alungdong l'eh tauvin, kithuopina muding kinepna lientah toh kotkha chuom-chuom akiule uvin, alolhin theina ding uvin taona'n geldoh zing ute.



Meilheite'n Meithal gudoh kit

November nisim 1, 2023 nilhah lam nidan 6 don chun Meilhei mi 700 val akitol uvin, 1st MR, Imphal ah meithal kichoi in alut uvin ahi. Amaho'n DGP Pool Arm Kote le Unit Pool Arm Kote akuon in meithal agudoh guo uvin, hinla security forces duty umho toh akimaituo kha uvin, CRPF mi 3 in liemna ana tuolo'n ahi.

AK 47, Insas, SLR, Tear Gas Gun le meichang tamtah ana gudoh man uvin ahi. Hiche chungchuon'a chun sepoy ho'n amanchah'u gari Bolero khat le Gypsy 6 zong ana lahpieh uve.

Shutdown le Rally

November nisim 2, 2023 nikhuo chun KSO-GHQ lamkaina nuoiya Kuki-Zo chate chenphana gam zouse'ah 48 Hrs. Shutdown ana kipan in ahi. Hiche

hi Meilheite'n Kuki-Zo chate chung'a nuoisetah'a achaloh uva, Central Government akuon'a kihetmosahna aum zing jeh leh tuchung'a Moreh mipite chung'a gentheina sangtah ana lhunsah Meilhei Commando ho chalohna demna'a kiphinna ana um ahi. Student Organisation dang dangho'n zong kithuopina anape uvin, boina umlou in ana chielha theiye.



Janni, November nisim 3 nikhuo'n Kuki Women Organsation for Human Rights lamkaina in 'Mass Rally Against Gross Violation of Human Rights' ti thupi'a mang in Leisang akuon in Peace Ground chan mipi'n lampi ana zui in ahi.

Frontline vilna nei

Achiesa October nisim 31 nikhuo chun ITLF Defence/UTV lamkaina nuoiyin frontline munni – Muolngat le Laika villhah anahi. Delhi akuon'a hung Pu Thanghnun le a inn-neipi Kim in frontline duty ho vohsa ana pelhon in, tilkhouna zong aneilhon'e. Amani nupa'n frontline a duty galhangho apachat thu aseilhon ban'ah gam-le-nam huhna'a lungthoi louhiel'a pang zing ding uvin zong tepna aneilhon in ahi.

Chule Muolngat le Laika khuo haosa le mess manager a pangho'n hitobang'a kipana jal'a thilpieh amu'u kipathu apuondoh uvin, innmun'a umho akuon'a hitobang a tilkhouna'a thilpieh amuji'u hi lungmuon um asathu'u zong aseidoh uve. Chule UTV lamkaiho'n zong Pu Thanghnun te nupa thilpha bawl thu'ah kipathu aseidoh uvin, maban'a zong mimal hileh kiloikhomna hileh kithuopina pieh zing thei ahida'n aseidoh uve.



COMING SOON

IN PHOTO MATTE PAPER QUALITY

₹599
ONLY



#MANIPUR MAYHEM KEY PLAYERS & EVENTS

A BOOK BY INDIGENOUS TRIBAL LEADERS' FORUM (ITLF)

FEATURES

THE TRIBAL NARRATIVES - STORIES FROM VICTIMS - DAILY INCIDENT REPORTS
ARTICLES FROM GUEST WRITERS - POEMS - STATISTICS

UPDATED TILL 03 NOVEMBER 2023



146
CONFIRMED DEATHS



200
VILLAGES BURNED



7000+
HOUSES BURNED



360
CHURCHES BURNED



41425
DISPLACED PERSONS



204
RELIEF CAMPS

RELIEF SUPPORT

Office: ITLF Secretariat, Hiangtam Lamka

Contacts:

Mangcha Thangzom – 8837368373 (Convenor)

V. Gouthianmuan - 9862086583 (Co-Convenor)

FINANCIAL SUPPORT

ITLF Joint Bank Account:

Name: Henkhopao Haokip & N. Vialkhanthang

Account No: 41912626404

IFSC: SBIN0064016 | Bank: SBI Salbung Branch